

kontuola

KONTUOLA, Idolaz elkarte, ANTZUOLA. Kazetaria: Marijo Deogracias **Maketazioa:** Iñaki Iturbe **Publizitatea:** Uxue Zabaleta **Erredakzio kontseilua:** Miren Anduaga, Gotzon Iparrairre, Patxi Kortabarria, Jone Larrañaga **Testuen zuzenketak:** Maripi Laskurain, Lierni Legorburu **Telefonoa eta faxa:** 943 76 65 08, Herri ikastetxea.

Antzuolako hamabostekaria, 43. zenbakia. 1999ko irailaren 24a.

Matz-Erreka, 38 urtean hazten

Lan berriekin 8.800 m² izango ditu Ibarretako kooperatibak

1961ean eratu zen Matz-Erreka enpresa. Mekanizatutako pieza txikiak egiten hasi ziren garai hartan. Hau da, prentsa barik tornuz egindako era guztietako torlojuak. Gaur egun, 220 lagun ari dira bertan lanean. Produktzioa ere zabaldu egin dute urteekin. Hori dela eta, handitze lanetan ari dira Ibarretan dagoen kooperatiban. Lan hauekin 8.800 m² izango ditu enpresak.

Hogeita hamazortzi urte dira Matz-Erreka kooperatiba eratu zela herrian. Orduetik, nahiz eta krisialdi garaiak jasan behar izan dituen, kooperatiba hazi egin da eta langile kopuruak ere gora egin du. Gaur egun, 220 lagun ari dira Matz-Errekan lanean. Mikel Agirrezabal zarauztarrak kudeatzen du Matz-Erreka, orain dela bederatzita urtetik. Berak dioenez, "1993an krisiak eragin egin zuen, baina zorionez, indartuta aterata ginen eta 1994tik eboluzioa goranzkoa izan da". Eta horren adibide da gaur egun egiten ari diren pabilioi berria. 1.550 m²-ko pabilioia ari dira egiten. Eta eraikuntza berriarekin 8.800 m² izatera iritsiko da Matz-Erreka.

PABILIOI BERRIA

Ateentzako eta pertsianentzako itxitura automatikoak egiten hasi ziren Matz-Errekan 1983an. Orduetik, produktio honek goranzko joera izan du. Hori dela eta, aspaldian, leku falta nabarmena zen. Gauzak horrela, eraikin berri bat egitea erabaki dute Matz-Errekako arduradunek. "Egoera onak handitze lana hastea ekarri digu" azaldu zigun Mikel Agirrezabalek. "Espainian, gaur egun, le-



Honela geratuko da Matz-Errekako eraikin berria.

henengoak izango gara arlo honetan, fabrikazioari dagokionez. Azkenengo 5-6 urteetan hazkunde nabarmena izan du. Azken bost urteetan salmentak hirukoiztu egin dira. Gauzak horrela, 1.100 milioitara helduko dira aurten. Langileei dagokienez, orain dela 7 urte 15 lagun ari baziren, gaur egun 50 bat dira honetan lanean. Honek denak, leku gabezia agerian lagatzea ekarri du eta eraikin berria egitea erabaki genuen". Pabilioi berria datorren urteko lehen hilabeteetarako amaitua izatea espero dute.

Pabilioi berriak bi solairu izango ditu. Batean, muntaia eta biltegia egongo dira. Bigarrean, elektronikak eta bulegoak. Gainera lehen itxitura automatizatuak egiteko erabiltzen zen lekua torlojuen tokiari gehituko zaio. "Honela, tokiari haize gehiago emango diogu. Izan ere, negozio hau azkenengo sei urteetan hirukoiztu egin da".

BESTE PRODUKZIO ARLOAK

Mekanizatutako itxiturez gain, Matz-Errekan hainbat lekutan aurkitu daitezkeen

2000. urteko lehen hilabeteetarako pabilioi berria martxan jartzea espero dute



1.500 m² izango ditu pabilioi berriak.

■ ■ ■
 “2001. urtera bitartean beste
 50 lanpostu eratzeko konpromisoa daukagu”

MIKEL AGIRREZABAL

■ ■ ■

torlojuak egiten dira. Industrietarako autoen, energia eolikoaren, eraikuntzaren, trenen, garabien eta meategien merkaturara zuzentzen dira Matz-Errekan egindako torlojuak. Adibide batzuk jarzteagatik, Anoetako futbol zelaiaren estalkiko torlojuak Matz-Errekan eginak daude, bai eta energia eolikoan erabiltzen diren airesorgailuetako hegalak lotzeko erabiltzen direnak ere.

Matz-Errekako beste produkzio arloa plastikoak dira. Negozio arlo honetan 1968an hasi ziren eta bere bilakera goranzkoa izan da urteetan. Hauxe da jende gehien lanean ari den sektorea. 90 kide ari dira, hain zuzen ere. Nahiz eta bere garaian beste produktu mota batzuekin hasi, gaur egun etxetresna elektrikoak eta autoentzako plastikoak

egiten dituzte. Euren piezak, osagaiak dira. Hau da, beste fabrikatzaile batzuek produktuak osatzeko beharrezkoak diren plastikozko piezak dira. Garbigailu, hozkailu edo bestelakoendako. Exijentziaz handiko merkatuetan sartu da Matz-Erreka azken urteetan. Bai kalitate bai eta beste arloetan ere kudeaketa sistema aurrerakoiak ezarri ditu.

ETORKIZUNARI BEGIRA

Matz-Erreka, etorkizunari begirako plangintza batean ari da: “Ekimen” izeneko programa. Eusko Jaurlaritzak bultzatutako proiektu honi esker, langile gehiago kontratatzea bultzatu nahi da.

Mikel Agirrezabalek azaldu digunez, “azkenengo urte honetan hogeitaz gora hasi dira lanean, eta 2001. urtera bitartean, beste 50 langile kontratatzeko konpromisoa hartu dugu. Gure langileak nahiko gazteak dira. Batez beste, 36 urte dituzte langileek eta hori ere etorkizunari begira garrantzitsua da. Gure helburua ahalik eta kontratu gehienak behinbetikoak izatea da. Hasieran behinbetikoak dira, noski, baina langileak erakusten baldin badu, bazkide izateko aukera luzatzen diogu. Gaur egun, %65 inguru bazkide da Matz-Errekan. Bestalde, “Ekimen” programan aurkeztutako planaren arabera, 1.100 milioitako inbertsioak egiteko asmoa du Matz-Errekak”.

EUSKARA PLANGINTZA

Herriko beste hainbat enpresa bezala, Matz-Erreka euskaratze plan batean murgilduta dago. Aurten ekin diote planari eta Mikel Agirrezabalen esanetan, “hiru urterako plangintza honekin euskararen erabilera normalizatu nahi da enpresa barruko komunikazioan. Jakin badakigu gure langileetako askok ez duela euskara behar bezala ezagutzen. Euskaraz berba egiten dugunon artean ere irakurtzeko eta idazteko zailtasunak ditugu. Hori dela eta, euskararen erabilera kaskarra da momentu honetan. Plangintza honi esker, hiru urte barru egoera hau hobea izango dela espero dugu”.

HAZKUNDE DATUAK

	1990	1994	1999
Salmentak (milioi PTAn)	1.000	1.400	3.500
Langileak	99	116	220
Lurzorua (m ²)	4.000	4.000	8.800



Zurrategi plaza 4, behea ANTZUOLA Tf. eta faxa 943 78 71 80

Sukalderako eta
 bainurako altzariak
 Altzari rustikoetan
 espezializatuak

GOROSTI
Taberna

☎ 943 76 62 96
 Zurrategi plaza ANTZUOLA

Euskal presoen eskubideen alde

Euskal Presoen eskubideen alde Antzuolan ere kontzentrazio isila egin zen joan zen eguakitzean. Gipuzkoako Foru Aldundiak egindako deia jarraitu zioten alderdi abertzaleetako udal ordezkariak.

Joan zen zapatuan, bestalde, Antzuola-ko udaletxeko 8 ordezkari izan ziren Bilbon egin zen udal hautetsien biltzarrean. Udalbiltzaren osaketa onartu zuten EAJ, EA eta EHko hautetsiek.



ARGAZKI LEHIAKETA

Urriaren 22a arte luzatu dute V. Argazki Lehiaketa. Udalak antolatu duen lehiaketan parte hartzeko edozein gai aukeratu daiteke. Lanak, berriz, 30x40 zentimetroko euskarri batekin aurkeztu behar dira. Koloretan edo zuri-beltzean izan daitezke, norberaren aukeran. Irabazleak 25.000 PTA lortuko ditu eta bigarren sarituak, berriz, 15.000 PTA. Gogoratu bina sari daudela, mailaren arabera: 25 urtetik beherakoendako bata eta 25 urtetik gorakoendako bestea. Jakin dugunez, gainera, aurkezten diren argazki guztiekien erakusketa bat egingo da urriko azken aurreko astebukaeran.

Gogoratu, beraz, urriaren 22a arte eraman ahal izango direla lehiaketarako lanak udaletxera.

PILOTA TXAPELKETA

Eskuz binakako herri mailako pilota txapelketa antolatu du Olalde Elkarteak. Hamabost urtetik gorako pilotazaleei zuzenduta dago eta bi mailatan jokatu da, iaz bezala. Izena emateko azken eguna irailaren 27a izango da, astelehena. Horretarako, Juan Tomas Erosteği, Jose Mari Galeano, Juan Simon Aristi edo Balendin Zabalorengana jo daiteke. Izen ematea 1.000 PTA kostako da bikote bakoitzeko. Antolatzaileek aditzera eman dutenez, "txapelketa pilota goxoarekin jokatu da".

SAN MARTINETAKO AZOKA

Lapatz lehenengo eta **Bidaurre** bigarren. Horixe izan zen joan zen asteko San Martinetako azokako emaitza. Tomas Larrañagak barazkien lehen saria eskuratu zuen. Kontxi Izagirrek, fruituen bigarrena. Jende ugari elkartu zen Bergarako azokan, eta antzuolarrek maila ona erakutsi zuten berriz ere.



MENDI IRTEERA

Arrola Mendizale Elkarteak Picos de Europa irteera antolatu du. Urriko zubian izango da, urriaren 9 eta 10ean. Sotres herrian hartu dute etxea. Informazio gehiago nahi izanez gero, Arrolara jo.

FUTBOLA ESTALAN

Antzuolako Futbol Taldeak zapatuan ekingo dio aurtengo denboraldiari. Andoni Azkargortak zuzentzen duen taldeak 16:30etan ekingo dio partiduari, Zarautzeko Antoniano taldearen aurka. Zarautzarrak iaz jaitsi ziren bigarren errejionalera.

LARREA

TABERNA

Kalebarren 17
ANTZUOLA



**Euskal
sukaldaritza**

**Eguneko
menua**

Kalebarren 7, ANTZUOLA Tf. 943 78 71 12

Igor eta Txomin C.B.

**Margoak
orokorrean**

ANTZUOLA 609 157 131
BERGARA 609 150 164

Jone Larrañaga, Maripi Laskurain eta Lierni Legorburu

Antzuolako euskeriari eutsi nahixan

Idolazek egitasmo berri bati ekin dio. Antzuolako euskerari eusteko asmotan Berbaola saila sartu zen Kontuolaren barruan. Sail honetako elkarrizketak Antzuolako hizkeran nahi izan ditugu, bertakoak idazteko ere balio duela frogatu nahian. Horretan jarraitzeko asmoa badaukagu ere, oraingoa, joko bat proposatzen dizue Idolazek. Kontuola guztietan lehiaketa bat egingo da, euskaraz berbe egiterakoan entzuten diren akatsak konpontzeko asmotan. Egitasmo honi buruz berba egin du Jone Larrañaga, Maripi Laskurain eta Lierni Legorbururekin.



Liburutegira eraman beharko dira zozketarako erantzunak.

Z e helbururekin antolatatu duzue ekimen hau?

Lehiaketa berri honen helburu nagusixa kalien entzuten diren akatsak zuzentzia da. Hortarako izez argitaratu zan Jone

Larrañagak egindako *Antzuolako hizkera* liburuaen edukixa hartu dogu kontuan, hor jasotzen direlako gure hizketiaren ezaugarriak.

Halako premia nabaritzen duzue?

Bai, geruago eta hankasartze haundixaguak egitten dira, hizkeriaren mailla danetan: esaldixak osatzerakuan forma edo errekurtsoko asko galdu dittugu; erderakadak pe asko sartzen dittugu, berba edo forma asko galtzen goiatzelako. Hizketia bera pobriagua da.

Umiak batez be egundoko astokeriak botatzen dittue: *baleikeda* eta antzerako astokerixa asko.

Gaztien artian be akordautu gare hika berba egittia asko gustatzen jakue-la, baiña eztabe bereizten zeinekin egin bihar daben, danekin egitten dabelako: lagunekin, gurasuekin edo aittajun- amandriekin. Eta gaiñera, bakarrik mutillena ikisi dabe, neskei be mutillena egitten jaue eta.

Lehenago Idolazek antolatatu ditu horrelakoak

Bai, akatsak zuzentzeko kaleko oharra eta lehiaketa. Bestelakuak ere bai: Antzuolako hika lantzeko ikastaruak, Antzuolako euskeran idazten ohi-tzeko ikastaru...

Halakuekin nahi doguna da jendiari akordau eragittia euskeraz egittia ez-tala nahikua, Antzuolako euskeriari eustia gure esku dagoela eta horretan ahalegi-ña danok egin bihar dogula.

Zela egingo duzue lehiaketa?

Hamabostian behin galderak egingo dittugu *Kontuolan*. Erantzun zuzener artian 5.000 PTA zozketatuko dogu. Gaiñera, aldiko *Antzuolako hizkera* liburua- ren 3 ale banatuko dittugu. Erantzunak liburutegira eruan bihar die alia kaleratu eta hurrengo eguakitza baiño lehen. ■

■ ■ ■
 “Geruago eta hankasartze haundixaguak egitten dira, hizkeran”
 ■ ■ ■



IGELTSEROTZA

Jose Luis Zabalo

Birgaitzeak • Fatxadak
 Teilatuak • Sukalde eta bainu gelak

Kalegoi 9, 1.a., ANTZUOLA. Tf. 943 76 60 89

**LEKU-BERRI
 MERENDEROA**

Janariak eta edariak

Tf. 943 76 60 94



Jose Gomez
 Abad

Errekalde 6, 4-B. Antzuola
 943 76 60 19
 943 76 60 43

AITZ-GARBI



taberna
 jatetxea

**Pintxoak eta kazuelatxoak.
 Bazkariak eta afariak**

Kalebarren 15. Tf. 943 78 70 57